

# DEO OPTIMO MAX.

## UNI ET TRINO,

VIRGINI DEI-PARÆ, ET S. LUCÆ  
Orthodoxorum Medicorum Patrono.

### QUÆSTIO MEDICO-CHIRURGICA,

QUOD LIBETARIIS DISPUTATIONIBUS  
*manè discutienda in Scholis Medicorum, die Jovis decimo-sexto  
mensis Februarii, anno Domini M. DCC. LVIII.*

M. JACOBO BARBEU DU BOURG, Doctore Medico,  
Regiæ Scientiarum Academiæ Stockholmienfis Socio, & Chi-  
rurgiæ Professore designato, Theses Auctore, Præsîde.

*An Tracheotomia nunc scalpellum, nunc trigonus mucro?*

#### I.



**T**RACHÆA, sive aspera arteria, ductus est partim cartilagineus, partim membranæus, per quem aer pulmones subit, à pulmonibus regreditur. Admissi emissique aeris gratâ vice diù carere vita nequit; hinc primariis vitæ organis meritò accensetur pulmonalis fistula, inde verò perperam creditum quodlibet ipsius vulnus lethale. Est ubi Trachææ vulnere pessumderetur ipsius actio; est ubi illæsa officio suo desit, læsa eodem sat bellè defungatur. Trachæa quidem in totum seciâ, subducit se extremum inferius, pressumque ab adjacentibus partibus muneris sui obliviscitur, adestque præ foribus satuin ineluctabile; alit ubi vulnere quantumvis amplo ita læditur, ut æqua transmittendo aeri via pateat, nihil ferè minùs lethiferum. Id ratio suadet; id ipsum evincunt observata certissima. Frequentissimi quippe Medicis & Chirurgis occurrunt casus hominum quorum alii à latronibus confossi difficillam reportarunt asperam arteriam, nec minùs postea sanati fuere; alii vitæ periculi violentas sibi manus intulerunt, mox etiam nonnulli inductam Trachææ vulneratæ suturam dilaceraverunt, pertinaciùs verò commissis iterùm glutinatiisque arte Chirurgicâ vulneris oris, hî tandem inyiti à morte vindicati, illi sibi metipsis reconciliati vitam perpeti didicere. En etiam quod magis mirum primò intuitu videri queat: nonnemo, insigni Trachææ parte abscissâ & ablata, plurimis tamen annis supervixit, licet grandioris vulneris labia ad se invicem adduci nunquam potuerint, sed hiulcum foramen ingens remanserit, spongiâ usque regendum; quod sibi visum testatur Swietenius. His nititur certissimis fundamentis Trachæotomiæ (seu Bronchotomiæ aut Laryngotomiæ dicere magis) operatio, quâ scilicet ægris spiritum vix ac ne vix quidem ore trahentibus, Trachæa consultò inciditur, ut ea redintegretur functio quam diutius intermitteri lethale est.

#### II.

**I**MPEDIMENTUM transmittendo aeri duplex imprimis in Trachæa suboriri potest. Sive enim cavum ipsius offerciat inopino casu intrusum corpus extraneum; sive ejusdem orificium appressis invicem parietibus coarctet tumor aliquis, ac præsertim phlegmonodes; dirum utrobique suffocationis periculum. Prius nonnunquam

A

neurrunt qui lascivientes inter epulas, cibis ore pleno, in risus inconditos temerè exfolvuntur; tunc quippe surrectâ subitè epiglottide, simulque laxatis vocalibus Ferrenii fidibus, facilè deviantia ciborum frustra, fructuum ossicula, aut similia quævis hylcum glottidis ostium errore subeunt irremeabili; hinc enim rursus superas ad fauces evadere posse spes adedè exigua est, ut sæpè ipsa ægri conamina strangulationem celerare potiùs quàm bolum evocare queant. Nec mitius incumbit malum sicubi laryngem glandulasque supræmæ parti asperæ arteriæ circumpositas vehementior invadit inflammatio, ut fit in *Cynanche*; quo quidem in morbo Hippocratica illa occurrit respiratio sublimis, scapularum præcipuè musculis auxiliantibus exercita: suprà dorsum erectus, jamjà suffocandus æger, amicorum dum imporat opem, pro voce quasi sibilum edit; sævit acutissimus dolor, ac nisi præsentissimum adit auxilium, morbus in horas exacerbatur; vacillat pulsus, cruore suffusi prominent oculi tuberantes, ore contineri impos lingua velut fune suspensis exseritur, fervent dulci aeris refrigerio defraudati pulmones, Tantalus alter obvias hiando vix capiat auras, adrolantemque pernicibus alis mortem summas inter angustias opperitur.

### III.

**A**d extremos morbos extrema exquisitè remedia optima docet Hippocrates. In utroque casu suprà memorato una salus miseris nullam, nisi gutture ocyùs inciso, salutem sperare. Congruunt tamen unicuique speciei cautela propriæ, aliud atque aliud instrumentum.

Ubi extraneum quid interiori aeris ductui præter naturam insidet, experientissimè Chirurgi quo se modo gerant, en accipe. Caput ægri in lecto, aut in sella idonea resupinati probè firmat minister quidam à tergo positus; ipse autem Chirurgus coràm adstans, medio serè jugulo (ab uno circiter pollice infra cartilaginem thyroideam ad sternum usque) cutem cum subjectis musculis scalpello ita dissecat, ut binos trevè digitos, imò forte quatuor in proceris corporibus, adæquet longitudine vulneris, cujus oræ mox à ministrorum altero per injectos hamulos guaviter diducuntur; tum spongiæ aut carpti lineamenti ope abstergitur cruor omnis, quò faciliùs in conspectum findenda prodeat Trachæa; ac tandem tres quatuorve annuli cartilaginei secundum colli longitudinem inciduntur; atque ità quidquid ibidem intrusumprehenditur, per immissum specillum, vossellamve aut hamulum foràs protrahitur quàm solertissimè. Quo peracto, nihil aliud superest nisi ut expurgatum deligetur glutineturque vulnus, cujus labia sibi invicem commissa, quasi sponte suâ, coalescent. Hac ratione frustum boleti cocti, quod viro jocanti simulque jusculum in quo varia condimenta non deerant assatim ingurgitanti, in Trachæam cum imminente suffocationis periculo inciderat, feliciter effudit Heisterus. Hac eadem arte fabam è cujusdam gutture extraxit Ravius, ægrumque sospitem in vado constituit.

Nunc quoad anginam plura consideranda veniunt, tum quæ Medicum consilium ac prudentiam, tum quæ Chirurgicam operam ministeriumque respiciant. Tempus imperandæ Trachæotomiæ idoneum cautè discernere non cuivis datum est. Quandiù resolvendæ inflammationis iusta spes affulget, quidvis priùs tentandum quàm operatio instituatur apparatu ipso adedè formidolosa, exituque nunquam non anceps. Rursus si phlegmonem jam exceperit gangræna, infarctasvè immeabili sanguine pulmonales arterias doceat pulsus debilis, vacillans, intermittens, cum extremorum frigore; egregium remedium vide ne gratis infametur præposterè adhibendo; gravissimo quippe morbo conflictatis ritè succurrit Trachæotomia, non in mortis agone constitutis. Nec minori attentione ac solertiâ perpendi meretur locus affectus. Si nimirum circa laryngem, aut in Trachææ parte superiori inflammatio hæreat, subjectas partes audetò lacerare; si verò secundum Trachææ longitudinem versùs pulmones serpat inflammatio, quod serè ex ipso ægri sensu cognoscitur, deploratis jam rebus, ab ea opera supersedendum undè fructus nullus expectari debeat. At si dubiù aliquid circa mor-

bi sive præsentem statum, sive sedem propriam, atque adeo circa ipsius Trachæotomix opportunitatem subesse videatur, Medico fortè etiam tunc satius fuerit à suspectâ medicatione abstinere, ne eum jugulasse putetur quem sua fors confecerit; ipsi autem ægro longè præstabilius in certò lethali cynanche anceps quàm nullum remedium experiri; porro Medicis orthodoxis rumores ante salutem ponere grande flagitium censuimus. Ubi igitur ingravescens angina medellam omnem eludit, naturali glottidis osculo nimio perè coarctato, nova quasi glottis ab arte petatur etiam atque etiam suademus; Albucaque, Casserio, Heistero, &c. calculum addimus, pro imperitis aut meticulosis, imò propè homicidis eos habituri qui dum operationem sæpe valde salutarem temerè negligunt, ægros fidei suæ creditos morti addicunt indubiæ. Ant. Brassavolus propriis manibus, detrectante Chirurgo, Squinancici cujusdam jam-jam animam expiraturi Trachæam incidit, oricque è faucibus eripuit; & non solum hac vice, sed & aliàs pluriès idem se felici cum successu tentasse scribit. Eodem præditi genere Benivenius à se substractum morti anginosum asserit. Nec minus auspiciatâ audaciâ celebratam, tum in hortulano, tum in milite, Trachæotomiam testatur Ren. Moreau. Sic etiam apud Scotos Martinus, apud Anglos Kéen, apud Hispanos Virgili, idem tentare ausi, eandem laudem, restitutis ægris, promeriti sunt. Jam igitur mactè animo, civicam quisquis coronam reportare cupis. Ægro quantum licebit aptè constituto, interstitium tertii & quarti annuli cartilaginei pertentando indice queratur; eoque loci chalybeus mucro trigonus (vulgò *Troisfart*) argenteum indutus canaliculum \*, in cavum asperæ arteriæ usque uno ictu adigatur; mox educto mucrone, canaliculus religato ad posteriora funiculo firmatus, emplastroque perforato obtectus, superinductâ rariori quâdam telâ, tandiù relinquatur in vulnere, donec ablata causâ quæ hanc operam exegerat, expeditior sorbendo per veram glottidem aeri via pateat; quod quidem facili peroscitur experimento, dum nempe canaliculi orificium admoto digito obturatur.

\* Instrumentum proponimus qualiter ubique  
prostat Chirurgis omnibus satis familiare; nã-  
gis tamen arderet nonnihil complanatum, aut  
lamella quædam simili canaliculo obducta.

#### IV.

**E**NCHIRESEOS utriusque ratio in promptu est. Ubi noxiæ rei educendæ causâ operatio instituitur; ut ominoso Trachæa liberetur obturamento, justæ amplitudinis requiritur apertura, quam quidem secans instrumentum ritè præstiterit, nequaquam verò trigonus ille mucro asperam arteriam modico tantum foramine pungens; interea vix ullus subest sanguinæ derivationis metus, intromittendi canaliculi nulla prorsus necessitas, statimque ab operatione peractâ, vulneris labia sibi invicem committere licet, brevi coalitura. Ubi verò ægros præfocans, acerba cynanche proximam intentat necem; non aded magnâ Trachææ incisione opus est, libera ut redeat aeri usura; lineæ unius aut sesquilineæ diameter esto; plagam verò priùs glutinari nefas, quàm morbi ipsius causam efficaci medellâ sustuleris; hinc relinquendus in vulnere canaliculus. Præterea inflammationem è viciniâ arcessi propagarique in præcipiti est; minùs itaque ex re in eo casu foret scalpelli usus, à quo nimis operosa sectio, & quasi partitis vicibus peragitur, majori proinde cum dolore, nec spernendæ derivationis metu; dum verò mucrone illo chalybeo uteris, propere unoque ictu cum integumentis & musculis ipsa Trachæa quantum satis hiat, simulque intromissus adest canaliculus; undè sese nobis amicâ operæ simplicitate mirè probat Deckeriana hæc methodus.

#### V.

**N**EGABANT Antiqui læsas cartilagine posse coalescere; sed error ille jam pridem evanuit. Verebatur etiam Arææus ne per Trachæotomiam anginosa au-

7

geretur inflammatio; non quidem vanus iste terror, attamen duo sunt quæ nos adversus eum quamdamtenus obfirmare debeant; primò quòd infrà locum affectum fieri ut plurimum queat asperæ arteriæ sectio; deindè quòd non statim inflammetur vulnus labia. Vulnus hæmorrhagiam immediatè concitat, quæ sanguinem potius ab inflammatis partibus revellere, (quod opportunè admodum in eà ipsà operatione sibi contigisse refert Martinus) quàm uberiorem copiam hùc derivare potis sit; mox sistitur hæmorrhagia, tum ob retracta compressaque arteriolarum oscula, tum ob coagulum quoddam stillantibus guttis, sicque aëri oppositis, inductum; tandem exclusus indè sanguis circumfusa vascula gravat & oblitpat, undè inflammatio. Hinc observationibus innumeris compertum est vix antè tertium ab inflictis vulneribus diem ingruere pendentem ab ipsis inflammationem, quod sanè tempus in tam præcipiti morbi impetu lucrifacere non exigui momenti putandum est, cum præsertim efficacissimis remediis exhibendis locum dare valeat. Non desunt qui trigoni mucronis usum omninò reprobest; dum scilicet, inquirunt, magnà vi in Trachæam mobilem facilèque vacillantem adigitur, periculum est ne aut deviet instrumentum satis crassum, aut posterior cum anteriore lædatur Trachææ paries. Quos angit ea sollicitudo viri meticulosi solum adhibeant scalpellum, non equidem reclamabimus, risum verò artis principibus moturi sint, necne terrore importuno ipsi viderint; re enim ipsa nullum huiusmodi periculum imminet, modò non obtusa acie, non rudis Chirurgi manu operatio instituitur,

*Ergò Trachæotomia nunc scalpellum, nunc trigonus mucro.*

### DOMINI DOCTORES DISPUTATURI.

*M. Claudius-Francisus Grand-clas, Eques, Stanislaus Polonorum Regis, Lotharingia & Barri Ducis Consiliarius & Medicus, necnon Artis Obstetriciæ in gratiam Matronarum Professor.*

*M. Joannes-Francisus-Clamens Morand, Eques, Regia Societatis Lugduni Socius, Regii Medicorum Nanceianorum Collegii Socius Honorarius.*

*M. Martinus Nonguez,*

*M. Ludovicus-Alexander Ger-vaise.*

*M. Ambrosius Hosty,*

*M. Joannes-Mag Mahon, Antiquus Exercituum Regis & Nosocomiorum Militarium Medicus, Regis Consiliarius & Regiæ Scholæ Militariæ Medicus ordinarius,*

*M. Michael-Ludovicus Vernaige, Eques, & Censor Regius.*

*M. Claudius-Antonius Renard,*

*M. Petrus-Antonius Lepys*

Proponebat Parisiis GUILLELMUS BERTHOLD, Salino-Bisuntinensis;  
Saluberrimæ Facultatis Medicinæ Parisiensis Baccalaureus, A. R. S. H,  
1758, A SEXTA AD MERIDIEM,